

22/11/2001

Kerajaan tidak kompromi terhadap pelampau: Najib

Azman Mahmood

KOTA BHARU, Rabu - Kerajaan tidak akan berkompromi dengan mana-mana pihak atau kumpulan yang cuba melakukan tindakan bertentangan dengan perlembagaan dan Islam, di negara ini.

Ketegasan itu termasuk terhadap kumpulan pelampau yang cuba melakukan tindakan keganasan dengan mendakwa berjuang atas nama agama.

Menteri Pertahanan, Datuk Seri Mohd Najib Razak, berkata perkara yang berkaitan keselamatan negara dan rakyat, tidak boleh dipermain-mainkan.

Katanya, kerajaan amat bertanggungjawab dalam hal itu dan sebarang tindakan diambil bukan berkaitan politik.

"Ingin saya tegaskan sesiapa yang menggunakan sebarang bentuk tindakan yang tidak diizinkan perlembagaan dan agama kita (Islam), kerajaan Malaysia tidak akan berkompromi dengan mereka.

"Soal keselamatan dan keamanan perkara serius yang tidak boleh dijadikan bahan politik," katanya pada majlis berbuka puasa anjuran Jawatankuasa Perunding Hal Ehwal Wanita (Hawa) Negeri Kelantan, di sini, malam tadi.

Turut hadir Pengerusi Hawa negeri, Zaleha Hussein, bekas Menteri Besar Kelantan, Tan Sri Mohamed Yaacob, Panglima 8 Briged, Brig Jen Ramli Harun dan Setiausaha Badan Perhubungan Umno Kelantan, Datuk Ahmad Rusli Iberahim.

Mohd Najib yang juga Naib Presiden Umno, berkata parti pembangkang termasuk Pas membuat penilaian negatif terhadap langkah kerajaan menangani kegiatan kumpulan militan di negara ini yang boleh menjejaskan keselamatan rakyat dan negara.

Bagaimanapun, katanya, demi kepentingan keselamatan, kerajaan berjaya bertindak cepat menangani kumpulan pelampau agama seperti Kumpulan Militan Malaysia (KMM).

"Tapi, Pas menuduh kerajaan sengaja mengada-adakannya dan sandiwara semasa.

"Seperti peristiwa Bukit Jenalik, Sauk, di Perak, tak mungkin kita boleh mencari pelakon untuk berlakon kejadian sebenar membabitkan pembunuhan anggota keselamatan. Tapi, inilah apa yang berlaku," katanya.

Sebab itu, katanya, Perdana Menteri, Datuk Seri Dr Mahathir Mohamad mencabar Pas mengemukakan model negara Islam di Malaysia tetapi sehingga sekarang parti pembangkang itu gagal menjelaskannya.

Beliau berkata, Pas sebenarnya bermain politik dan parti itu sendiri tidak tahu bercakap mengenai model negara Islam seperti Umno lakukan sekarang.

"Pas takut nak beritahu apa model Islamnya, sampai sekarang senyap. Kononnya nak tiga jam dalam televisyen baru boleh terangkan model (negara Islam) mereka (Pas)," katanya.

(END)